

7

Plaise à Nosseigneurs du Conseil, auoir pour
recommandé en Iustice, le bon droict,

Des Religieuses Hospitalieres de la Charité Nostre Dame, establies der-
riere la Place Royale, opposantes à la Commission du Conseil, afin
d'euocation, & Reglement de Iuges.

*Contre Monsieur Maistre Geoffroy l'Huillier, Conseiller en la Cour,
& Maistre Guillaume Besnard, Cheualier, Sieur de Foras,
heritiers, à cause de leurs femmes, de la feüe Dame d'Orsay, &
Maistre Nicolas de Cleues, Curé de saint Jean, demandeurs
en ladite euocation.*



Considerer que telle euocation demandée est vne pure vexation, d'au-
tant que les opposantes ont faict voir en l'instance, que c'est lesdits Sieurs
l'Huillier & de Foras qui la demandent de leur chef, souz le nom dudit
de Cleues, Curé de saint Iean, leur amy & confident, ainsi qu'il resulte
des faicts, sur lesquels ledict de Cleues n'a voulu subir son interrogatoire, qui faute
de ce, ont esté tenuz pour recongneuz : car les parentelles alleguées sont desdits
Sieurs l'Huillier & de Foras. Que s'il y auoit lieu de demander telle euocation, ce se-
roit de la part des opposantes, lesquelles ne doutant pas de la iustice de leur cause,
veulent bien qu'elle soit iugée au Parlement de Paris, où elle est tout en estat.

Pour pretexte de ladite euocation, lesdits Sieurs l'Huillier & de Foras disent
souz le nom dudit de Cleues, que s'agissant de l'exécution du Testament de ladiète
feüe Dame d'Orsay entre toutes les parties, & que lesdits Sieurs l'Huillier & de
Foras ayant des parentelles audit Parlement il en doit estre euoqué, ce qui est vne
surprise, dont ils veulent vser, d'autant qu'audit Testament les opposantes n'ont
aucun interest : mais bien pour l'exécution d'une donation entre vifs, que ladiète
feüe Dame d'Orsay a faict aux Pauures, pour laquelle leur demande est toute di-
stincte & separée, en laquelle ledit de Cleues n'a aucun interest. Et la trauerse que
lesdites opposantes reçoient en telle euocation, est en haine de ce qu'elles ne veu-
lent remettre la moitié de ce qui est donné aux Pauures, ce qu'elles ne peuuent
faire : Et vous supplient de considerer, & de leur faire droict sur leur opposition
& renuoy audit Parlement de Paris, avec despens, dommages, & interests.

Monsieur de Seue, Rapporteur.

